

Pauro Tesaronika ezektsa bo ziwatahakazo

Pauro usa papeu Tesaronika ezektsa bo ziwatahakazo. Sesus myziksizo naha soho ziwatahaka. Deus Pauro ziapewwyky iwatahi katsa kino niwatihi tanymyryky.

¹ Uta Pauro ikiahatsa bo piwatahaka. Siras Timoteo iwatsa katuk mykaranaha. Ikiahatsa Tesaronika ezektsa, Sesus tuktsa tsimaha. Ahabo hi piwatahaka. ² Deus myzo. Atahi pahapokzitsiki. Mypehakatsa Sesus Kiristu kino niwatihi pahapokzitsiki. Deus Sesus Kiristu ahatsa pahapokzitsikinaha. Iwatsahi Deus humo ahakurētsaktsa anawa hi Deus mozihikik.

Kiristu myziksizoze hawa imyzubaha mozrukunaha, ana soho motsasoko ihuak ty mybo nyny my.

³ O mytukytsa ahahumo mykurētsa Deus bo tsimypamykysokonahaze:

— O Deus Tesaronika ezektsa, asahi Sesus tuktsa humo mykurētsa — tsimykaranaha. Iwatsahi wasani mykaranaha. Sesus humo tsimyspirikpotohinaha. Tyharape pokzitsikinaha. Tyharape pokzitsitohinaha. Iwatsahi mykurētsa. ⁴ Kytsa bo niwatihi ahasoho ty tsimypamykysokonahaze mykurētsa. Asahi Deus harere wabytsitsa izumubanahaze ahasoho ty tsimypamykysonaha. Katsaktsa ahasoho ty ustsa Sesus tuktsa bo tsimypamykysokonaha. Hawa ahapunihikrētsa tsimoziknaha. Iwatsatu sinini

tsimykaranaha. Sesus humo ahaspirikporētsa iwaze ustsā kystsā pahasininiwykynaha. Sesus humo ahaspirikporētsa tsimykaranaha. Ana soho hi ustsā tuktsā bo kystsā tsimypamykysokonaha.
5 Ahasininiwy humo tsimykaranaha. Anatyihi Deus ababo wasani mykara piwatawyky.

Ahasininiwy humo Deus tyryktsa tsimoziknaha. Ahasininiwy soho humo ahamysapyrētsa tsimoziknaha. **6** Iwatahi Deus wasani mykara. Hawa ha tsa pahasininiwyky iwaze Deus tihi mysisininiwyky. Iwa Deus wasani piwatawy. **7** Sesus myziksizoze ba sininizo zikaha. Kystsā niwatihī mytsaty mytsaty byija taha. Mypehakatsa Sesus myziksizoze mykurētsa tsimoziknaha. Sesus bijoikpe ikny mynasik naha humo taperyky. Sesus mynasikze ituk bijoikpe iknyktsa mynasiknaha. Sizikwyrēnikitsa.

8 Mynasikze izo hyrizik waha my. Hawa izo mokoroba nahawa atahi amy imysapybara pepykwy. Iwa my. Myziksizoze asahi Deus humo simykparawybyitsa mysisininiwyky. Myziksi zoze asahi Deus harere humo hŷbyi ziknakarana-hatsa mysisininiwyky. **9** Asaktsa Deus pauk baze ba zikaha metutu tahawahi mynapokyryknaha. Iwa mysisininiwyky. Deus zuba imysapyrēnikita my ana humo kino batu sihyrinymyry. **10** Sesus myziksizoze iwa pomoze. Ityryktsa isoho ty mopamykysoziukunaha. Asahi ihumo sispirikporētsa iwaze ipe maha:

— O Sesus ikia zuba wasani tsinakarata. Ikia hi tsamysapyrēta — maha. Ikiahatsa kino niwatihī situk Sesus bo tsimypamykysoziukunaha. Ihumo

ahaspirikporētsa iwatsahi ibo tsimypamykyosziukunaha. Isapyha humo hyŷ tsikykaranaha iwatsahi Jesus bo myharere tsiziubakanaha.

¹¹ Iwaze katsa Deus bo tsimypamykysonahaze. Pororo tsimykaranaha Deus bo ikiahatsa tshyhyryze tsimypamykysonaha. Ikiahatsa botu Deus harere bo hyŷ tsikaha. Iwatsahi ipe tsimaha:

— O Deus Tesaronika ezektsa ahumo atyryktsa moziknaha. Ikia tysisumuēhīkī iwatsahi simysapyrētsa moziknaha. Asahi wasaniha mozihikinaha iwatahi tysisumuēhīkī. Hawa wasani mozihikinaha iwa sibo tsimykara. Azikwy humo simysapyrētsa moziknaha. Hawa ha ty Jesus humo sispirikporētsa moziknaha — tsimaha. Iwa Deus bo ahatsyhyryze tsimaha.

¹² Iwaze kytsa mypehakatsa Jesus soho ahahumo mopamykyosziukunaha. Iwa zeka ahatuk tu niwatihi Deus humo tsiknakokonaha. Ikiahatsa kino niwatihi Jesus bo tsimysakibazikinaha. Iwaze Deus pahapokzitsiki. Mypehakatsa Jesus zipehata kino niwatihi pahapokzitsiki, asahi pahapokzitsikinaha.

2

Sesus sukmo sohowy myziksoze sa hawa maha.

¹ O katukytsa. Aba mypehakatsa Jesus Kristu myziksozaha soho humo mytsaty taha. Katsa ibo harape bo tsinazuzuknaha ana humo hi mytsaty tsimaha. Katsa ahape tsimaha. ² Mytsaty mytsaty byijataha. Kytsa ababo motsasonaha zeka:

— O iwaha pomoze Sesus myziksizoze botu ziharamu — mykaranahaze. Ikiahatsa waby waby byitaha. Asahi mybarapetu mykaranaha. Asahi mymynspihikbatakanaha zeka:

O iwaha pomoze Sesus myziksizoze botu ziharamu Deus hyrikoso mype nikara asahi mybarapetu mykaranaha. Utsa kino:

— O iwaha pomoze Sesus myziksizoze botu ziharamu Pauro mybo ziwatahaka asa kino niwatihi mybarapetu mykaranaha. Anaharere humo hi waby waby byitaha — mybarapetu mykaranaha.

³ Siharere humo ka ja paikpa mytsaty mytsaty byitaha. Siharere bo ka waby waby byitaha. Mymynspihikbataikiknaha zuba. Ikiahatsa pykyhytutaha. Iwa ha mozumuze kytsa sizubarētsa Deus harere bo batu h̄y zikaha. Tapara iwa maha. Simysapybyitsa mykaranaha ana humo kino siakparawy. Tapara kytsa Deus harere bo batu h̄y mykaranaha. Kyze maku mozumu atakta sipehakatsa mozik. Atahi Deus sukyrytsitsa pehatsa mozik. Ata kino Deus siakbatsa sapy bo myzipeha. Mopykba. ⁴ Tapara kytsa mysimiywi. Nanabyitaba kytsa bo mybarapetu mykara. Imysapybyita mozuruku. Kytsa pipehanaha zeka atahi batu ma ziky batu isopyksapy. Amy humo kytsa wasani mytsaty mykaranaha ana humo hi batu h̄y my. Uta zuba abazubata my. Deus wahoro zubata bo mytsuk. Anaeze dyhy my. Atahi — Utakta Deus my — iwa mybarapetu mykara. Imysapybyita mynakara iwatahi pispikhikbataka.

⁵ Uta ahaturuk ikykaraze Tesaronika eze ana soho hi iktsasoko. Kaharere kok tsihokdaharēna! Uta

ahatukze botu iktsasoko imysapybyita pehatsa soho humo botu iktsasoko. ⁶ Abaka Deus zikwy humo ba zikzumu. Iwaze pehatsa imysapybyita batu isukmo. Ana humo hi ahahyrinymyrētsa. Deus yh̄y my zeka imysapybyita mozumu. Isukmo byizeka mahani. Deus hȳy myze zuba imysapybyita mozumu.

⁷ Abaka kytsa sizubarētsa imysapybyita pehatsa harere bo hȳy mykaranaha. Iwatsahi simysapybyitsa mykaranaha. Deus harere bo yh̄yhabyitsa mykaranaha iwatsahi batu sispirikpo. Deus imysapybyita pehatsa soho mymywatawyky. Aibani zuba imysapybyita pehakatsa mozumu. Aba Deus hyrikoso myzubaha humo tsimypokzitsiukrēta. Atahi imysapybyita pehatsa pe batu h̄y my. Abahi atahi mymypokzitsiki piksispyk zeka. Iwaze imysapybyita pehatsa mozumu.

⁸ Iwaze imysapybyita pehatsa natakaha. Mypehakatsa Sesus Deus ziephirata myziksonoze imysapybyita pehakatsa pibeze. Hu my humo zuba pibezechik. Myziksonoze okoro zikywa mozik. Niytahi imysapybyita pibezechik.

⁹ Iwaze imysapybyita pehakatsa Satanas harere bo hȳy mykara. Satanas harereze mozumuku. Iwa mozumuze Satanas tamyrawy myziskyk. Itsapyriwy humo myspihikbataikik. Amy ty kytsa zikaha baraty ana kino mykara. Tsapyriwy humo mykara. Iwa itsapyriwy piwatawyky. Kytsa bo mybarapetu mynakara. Ana pokso hi mypybyrētsa mykaranaha itsapyriwy pokso iwartsahi mysimiwyikiknaha. ¹⁰ Kytsa myspihikbataikik. Asahi mohokdanaha h̄y. Imysapybyita mykara sibo mybarapetu mykara. Asa kino

mohokdanaha amy ty wasani humo batu siakparawy. Amy ty wasani ana humo hi batu waby zikaha. Iwatsahi simysapybyitsa mozihikiknaha. Deus bo mysioktyhyryk batu h̄y sisopyk.

¹¹ Iwaze kytsa Deus harere humo batu siwaby. Myspihikbatawy zuba siakparawy. Iwatahi Deus kino niwatihi:

— Ikiahatsa mospihikbatawy zuba ahakparawy. Iwa za iharere tsipiwbbynaha — my. Iwaze myispiphikbatakanaha. ¹² Iwatsahi tisapyrēna ty Sesus soho humo batu h̄y sisopyk. Simysapybyitsa mykaranaha zeka sakurētsa mykaranaha. Imysapybara siakparawy. Iwatahi Deus ispe my:

— O ikiahatsa batu ahamysapy. Iwatsahi batu katuk tynapykyryknaha. Ahawahi sinini ykarawy bo pahapeha ana bo metutu tsipahasapynaha — my.

Ikiahatsa hi Deus harere bo hȳy tsimaha.

¹³ O katukytsa ikiahatsa meky watu tsikyziknaha. Katsaktsa Deus bo tsimypamykysokonahaze ipe tsimykaranaha:

— O Deus Tesaronika ezektsa asahi Sesus tuktsa humo sakurētsa moziknaha — tsimaha. Deus ahahumo tsimypokzitsiukrēta iwatahi zahawatawy. Iwatsahi mykurētsa. Tubabatu zahawatawy. Iharere tsiwaby tsihikiknaha ikiahatsa bo ziwatawyky. Iwatsahi Deus hyrikoso humo iharere bo hȳy tsimykaranaha. Wasani tsimykaranaha. Sesus humo ahaspirikporētsa. Ityryktsa tsikyziknaha.

¹⁴ Deus hi zahakzoko. Wasaniha humo zahakzoko. Katsa tisapyrēna ty tsiktsasokonahaze

zahakzoko. Sesus mypehaktsa nimykzo iwatsahi ituk tsimyzurukunaha. Katsa mykurētsa ituk tsimyzurukunaha. Zipehata Deus bo nimyokthyryyk iwatsahi mykurētsa tsikyziknaha.

¹⁵ Iwaze mytukytsa amy ty katsa tsipahahyrinymyrykynaha pykyhytutaha tynakaranahaktsa! Amy ty katsa ikiahatsa bo tsiwatahakanaha pykyhytutaha tynakaranahaktsa! Tapara ustsa kytsa nimyhyrinymyrykynaha ana hi mysopyk niyzik. Ikiahatsa kino niwatihi mysopyk humo tsikspirikpotohinaha hÿ. Ana tyhi tsimykaranaha.

¹⁶ Mypehatsa Sesus myhumo tsimypokzitsiarēta babata. Deus myzo kino niwatihi myhumo tsimypokzitsiarēta. Botu mybo nitsasoko:

— O ikiahatsa katuk ahawahi tsinapykyryknaha — my. Iharere humo mykurētsa. Mymypunihikwyky. ¹⁷ Iwatsahi Deus bo tsimypamykysokonahaze ipe tsimaha:

— O Deus tysitsumuēhī, tysipunihikwyky. Iwaze hi pisapybakanaha. Wasape ha zuba motsasokonaha. Ikia humo simysapyrētsa moziknaha sakurētsa moziknaha — tsimaha.

Iwa Deus bo ahatsyhyryze tsimypamykysokonaha.

3

Ikiahatsa mytsyhyryze Deus bo tsimypamykysonaha.

¹ Abaka katukytsa ikiahatsa Deus bo mytsyhyryze typamykysonahaktsa! Iwa typamykysokonaha:

— O Deus tisapyrēna ty Sesus soho ty situk typamykysonahaze tysitsumuēhī. Aidy sizubarētsa bo typamykysoziukunaha. Kytsa bo mopamykysokonahaze iwaze aharere bo hȳ mykaranaha. ² Sakurētsa tisapyrēna humo maha. Ikiyahatsa mywatsa my. O Deus sisakimyijanikitsa ba ziksisininiwynaha. Kytsa tisapyrēna humo sispirikpobyitsa siaknitsitsa mysibakzykynaha. Asahi simysapybyitsa mykaranaha. Ikia batu h̄ȳ tsimy zeka ba ziksibanaha — tsimaha my.

Iwa Deus bo mytsyhyryze tsimypamykysokonaha.

³ Mypehakatsa kino pahatsumuēhīekik. Pahakuwyky. Imysapybyita ba pahasininiwy. Sesus humo ka ba zahabezenaha Sesus ahahumo tsimypokzitsiukrēta. Iwatahi imysapybyikita pokso ja ba ahapybyhuk. ⁴ Katsa ahahumo mykurētsa Sesus hi mymypokzitsiki ikiyahatsa soho humo myspihikrētsa. Amy ty tsikahahyrrinymyrykynaha ty atsatu tsimyzurukunaha. Myharere bo hȳ tsimykaranaha.

⁵ Katsa Deus bo tsimypamykysokonahaze ahat-syhyryze niwatihi:

— O Deus sihumo tsimypokzitsiukrēta. Ana soho ty hi tysihyrrinymyryky. Sihyrizikbarasorykrētsa moziknaha. O mypehakatsa tysitsumuēhī Kiristu wata sipunihikrētsa moziknaha. Zipehata tsipunihikrēta ituktsa kino niwatihi iwata sipunihikrētsa moziknaha — tsimaha.

Iwa Deus bo ahatsyhyryze tsimypamykysokonaha, de.

Sesus tuktsa tarabaja mahatsa.

6 Kyze mytukytsa usa spirikpowy tsimaha. Mypehakatsa Sesus Kiristu iharere ababo tsimytsasonaha. Wastuhu kytsa ahatuk zeka batu tarabaja zikaha. Ba ziksitsumuēhīnaha. Tarabaja batu hÿ zikaha. Sizikarētsa. Myspirikpowy soho humo batu waby zikaha iwatsahi sibo batu tyso. **7** Ikiahatsa botu ahahyrinymyrētsa. Katsaktsa ahatukze tsikahatsumuēhīkiknaha. Tarabajaziu tsikykaranaaha. Iwa zikzurukunaha. Katsaktsa mypasaratsihikrētsa. Iwatsahi ikiahatsa astatu namysopykzuku mywatsa ikiahatsa ahapasaratsihikrētsa tsimoziknaha.

8 Katsaktsa tarabajaziu tsikykaranaaha. Okoroze unata kino niwatihi tarabaja tsikykaranaaha. Ahadisahawy ty mybo nyny tsikykaranaahaze katsa okyrysaro ty ababo nyny tsikykaranaaha. Ihuak ty okyrysaro nyny tsikykaranaaha. Kytsa nimytsumuēhīkīnaha zeka okyrysaro ty sibo nyny tsikykaranaaha. **9** Iwa tsimyzurukunaha. Ikiahatsa astatu mysopykzukutsa kytsa. Mywatsa tihi tsimyzurukunahaktsa! Katsaktsa Sesus ykzohotsa disahawy ty mybo nyny tsimaha zeka wasani tsimaha. Katsa mykzohotsa ahawahoro tsarawybyita humo hañhañ tsimaha zeka wasani tsimaha. Katsaktsa batu hÿ tsimaha. Katsa hi tsipahatsumuēhīnaha okyrysaro ty ababo nyny tsikykaranaaha. Iwaze myhyriziktsokzawy bo iksa tsimaha. Iwaze ikiahatsa mywatsa tu tahaktsa! **10** Botu tsiktsasokonaha ahape tsimaha:

— Aty mytuk mytytsumuehi ahabyizeka ba zik tadiraha. Aty mytuk yhÿ habyi zeka iwatahi idisahawy ty batu ibo nyny tsimaha — tsikaha.

11 Wastuhu kytsa ahatukze batu ahaty

tsumuēhī. Sizikarētsa maha mopamykysoikik-naha zuba. Batu iktsa zuba zikaha. Ana hi tsiwabynaha sizikarētsa soho iwatsahi tsinymyryzonaha ihyriziktsokzawy soho tsimaha. ¹² Myspirikpowy tsiwabytoktonaha. Wabyziutaha! Sihyriziktsokzahabyitsa pe my:

— Mypehakatsa Sesus Kiristu humo tsipahak-zonaha. Ihyriziktsokzawy humo zikbyituhukutu! Iwatsahi atukytsa tsimysidisahawyknaha. Pykyhytutaha humo, wasani tsimykaranaha — tsimaha. ¹³ Ikiahatsa, mytukytsa hi batu ahaku byrizikzumu tisapybakanahaktsa! Ahamysapyrētsa tsimoziknaha.

¹⁴ Aty myharere bo ahabyi zeka tsinytoktonaha. Aty myharere papeu humo batu h̄y my zeka ba ituk zikpamykyso. Batu ituk zikparāk iwaze hi tisikpybyrēta mozik. ¹⁵ Iwata humo ba zikmykyriwy. Atsy wata ipe tsimy:

— O katsy Deus harere bo wabyty! Iharere bo hȳy tsimy. Ikia Sesus humo tispirikporēta tsimykta — tsimaha.

Aba kaharere mopykyk.

¹⁶ Katsa Deus humo ahatsyhyryze tsikzapykyknaha. Katsa hi:

— O mypehakatsa ikia tsimymykuwyky. Iwaze batu paikpa mytsaty tsimykaranaha. Ahakurētsa tsimynakaranaha h̄y — tsimaha.

¹⁷ Abaka uta babata tu, piwataha. *Utakta Pauro ahahumo kahyrizikbarēta* my. Iwa piwatahaka. Papeu humo tsizubarēna iwa piwatahaka.

Deus pahasapywyky.

¹⁸ Abaka Deus pe my:

— O mypehakatsa Sesus Kiristu tysipokzitsiki.
Sizubarētsa humo tsimypokzitsiukrēta — my. De.
Pauro

Deus Harere Aibaky Sesus mymyspirikpoko naha

New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
2f0260ea-5969-5180-9ac5-183d63a989f1